



SOGFBiH

SAVEZ OPĆINA I GRADOVA
FEDERACIJE BOSNE I HERCEGOVINE
Association of municipalities and cities of the FBiH

GODINA: XVI

BROJ: 256

DATUM: 15.03.2019.GODINE



Usluge Saveza

• PRAVNO SAVJETOVALIŠTE:

Selma Fišek, viši saradnik za pravna pitanja
fax: + 387 33 552 810
selma@sogfbih.ba

• FINANSIJSKO SAVJETOVALIŠTE:

Gregor Jurišić, viši saradnik za finansijska pitanja
fax: + 387 33 552 810
gregor.jurisic@sogfbih.ba

Sadržaj biltena:

Održana Sedma sjednica
Predsjedništva Skupštine Saveza
općina i gradova FBiH 1

Održana Konferencija "Uticaj
procesa pristupanja Evropskoj
uniji na jedinice lokalne samou-
prave 2

Konsultacije prilikom donošenja
Zakona o zaštiti od požara i
vatrogastvu nisu izvršene u
skladu sa Zakonom 4

Održana TOT radionica o
ciljevima održivog razvoja 4

Predstavnici Saveza na proslavi
obilježavanja Dana Općine
Jablanica 5

Najava sastanka Mreže prak-
tičara/koordinatora iz jedinica
lokalne samouprave za rad sa
mjesnim zajednicama 5

Poziv za prisustvovanje sajmu
"Macfurt 2019" 5

Najava obilježavanja Dana
općina i gradova za mjesec
mart/ožujak 6

Bilten Saveza općina i gradova Federacije Bosne i Hercegovine

ODRŽANA SEDMA SJEDNICA PREDSJEDNIŠTVA SKUPŠTINE SAVEZA OPĆINA I GRADOVA FBiH

U Posušju je 26. februara/veljače 2019. godine održana Sedma sjednica Predsjedništva Skupštine Saveza općina i gradova Federacije Bosne i Hercegovine na kojoj je predsjednik Predsjedništva Skupštine Saveza općina i gradova FBiH, Hamdo Ejubović istakao važnost rada Predsjedništva Skupštine Saveza u borbi za prava koja se tiču lokalne zajednice. - Rad Predsjedništva Skupštine Saveza se bazira na ostvarivanju većih prava jedinica lokalne samouprave u svim oblastima razvoja i unapređenja lokalne zajednice. Mi želimo dobiti zasluženi status i bitniju ulogu kroz naše djelovanje. Kada je riječ o Mapi puta, mi u jedinicama lokalne samouprave smo trasirali naš put približavanja u EU - istakao je Ejubović.

Članovima Predsjedništva je prezentiran Okvirni godišnji plan Saveza za tekuću godinu, izrađen u sklopu Projekta „Jačanje kapaciteta saveza općina/opština i gradova u Bosni i Hercegovini“. U godišnjem planu su identifikovane aktivnosti vezane za lobiranje i zastupanje interesa jedinica lokalne samouprave, pružanje usluga članicama, kao i osnovne institucionalne usluge Saveza.

Savez općina i gradova FBiH, u saradnji sa Savezom opština i gradova RS, planira 13. marta/ožujka 2019. godine organizovati konferenciju na temu: „Predstavljanje analize uticaja EU leglislative na jedinice lokalne samouprave i iskustva regiona“. Na toj konferenciji učesnici će imati priliku čuti iskustva i dobre prakse učešća jedinica lokalne samouprave zemalja regiona u procesima EU integracija.

Predsjedništvu su predloženi i zaključci sa sjednica komisija, te su informisani i o aktivnostima Saveza na projektima: „Jačanje uloge mjesnih zajednica u BiH“ i „Regionalni program lokalne demokratije na Zapadnom Balkanu“ (ReLOaD).



Na sjednici Predsjedništva Skupštine Saveza općina i gradova FBiH



Ejubović: JLS su trasirale put približavanja u EU

Na sjednici, Predsjedništvo se, između ostalog, upoznalo sa detaljima Osnivačkog sastanka Mreže za javne finansije/finansije Saveza općina i gradova FBiH održanog 12. februara/veljače 2019. godine u Mostaru, čija je glavna svrha jačanje aktivnosti i inicijativa u segmentu javnih finansija općina i gradova u FBiH i jačanje saradnje i koordinacije pomoćnika načelnika za finansije/finansije.

Članovi Predsjedništva su se na sjednici upoznali i sa zahtjevom Saveza za obustavu primjene Zakona o izmjenama i dopuni Zakona o komunalnim taksama u Kantonu Sarajevo. Nakon sastanka sa Elmedinom Konakovićem, predsjedavajućim Skupštine KS i Amelom Kovačevićem, ministrom finansija KS, održanog na zahtjev Saveza i općina u KS, dato je obećanje da će sporni Zakon biti vraćen u skupštinsku proceduru, te da će općine u KS i Savez biti konsultovani u postupku donošenja ovog zakona.

ODRŽANA KONFERENCIJA „UTICAJ PROCESA PRISTUPANJA EVROPSKOJ UNIJI NA JEDINICE LOKALNE SAMOUPRAVE



Travljanin: Savez prepoznaje bitnu ulogu EU integracija za jedinice lokalne samouprave

U organizaciji Saveza općina i gradova Federacije Bosne i Hercegovine i Saveza opština i gradova Republike Srpske, u Sarajevu je 13. marta/ožujka 2019. godine održana Konferencija „Uticaj procesa pristupanja Evropskoj uniji na jedinice lokalne samouprave“.

Konferencija je imala za cilj da upozna predstavnike relevantnih institucija i organizacija, sa nalazima izrađene analize i proizašlog Izvještaja sa potrebama i budućim koracima saveza i jedinica lokalne samouprave u BiH u procesima pristupanja Evropskoj uniji. Gđa Vesna Travljanin, direktorica Saveza općina i gradova FBiH, istakla je da Savez prepoznaje bitnu ulogu EU integracija za jedinice lokalne samouprave. Naglasila je da se ne radi samo o povlačenju fondova EU, već se radi o cjelokupnoj pravnoj stečevini EU, da će Savez istinski raditi na pripremi jedinica lokalne samouprave, te da to nije proces koji će se desiti preko noći.

Dva saveza su sa partnerima u protekloj godini sproveli analizu uticaja procesa pristupanja Evropskoj uniji na jedinice lokalne samouprave u BiH iz pet oblasti pravne stečevine, i to: „Javne nabavke“,

„Zapošljavanje i socijalna zaštita“, „Regionalna politika i strukturni instrumenti“, „Ruralni razvoj“, „Životna sredina i komunalne usluge“, kao i „Iskustva Hrvatske - uloga lokalnih vlasti u procesu pridruživanja“. Iz analize proizilaze slijedeći važniji zaključci: Pristupanje EU značajno će uticati na jedinice lokalne samouprave – kao kupce roba i usluga, promotere lokalnog ekonomskog razvoja, provoditelje standarda, regulatore, poslodavce i drugo. Jedinice lokalne samouprave treba gledati kao partnere u ovom procesu (ne samo aktere). One su odgovorne za provedbu dijelova pravne stečevine i važan su kanal za dobro korištenje mogućnosti finansiranja sredstvima EU. Nije prerano za početak priprema – nešto od toga se već događa a za neke od mjera bit će potrebno nekoliko godina. Ukoliko se bude čekalo na datum za pristupanje, bit će prekasno.



Konferencija je imala za cilj da upozna predstavnike relevantnih institucija i organizacija, sa nalazima izrađene analize i proizašlog Izvještaja sa potrebama i budućim koracima saveza i jedinica lokalne samouprave u BiH u procesima pristupanja Evropskoj uniji



Detalj sa Konferencije

**KORISNI LINKOVI ZA
PREDPRISTUPNE FONDove EU:**

www.southeast-europe.net
www.adriaticipacbc.org
www.interregadriatico.it
www.europa.ba
www.cbib-eu.org
www.cbc.bih-mne.org
www.srb-bih.org
www.cbc-cro-bih.net
www.programmemeu.eu
www.tacso.org
www.euroinfocentar.ba
www.balkanfund.org
www.eurelmed.com
www.eacea.ec.europa.eu

Pristupanje se ne svodi samo na fondove EU-a, ono će donijeti mnogo drugih obaveza i mogućnosti za lokalni nivo, bilo izravno iz pravne stečevine EU-a ili kroz promjene koje će nastati (i koje su već u toku) u državnom i entitetskom zakonodavstvu i praksama. O ovoj temi su diskutovali i panelisti, predstavnici viših (kantonalnih, entitetskih i državnih) nivoa vlasti koji su iz svog ugla komentarisali i ulogu jedinica lokalne samouprave u ovim procesima.

Iz iskustava iz regiona, predstavljenih na Konferenciji od strane kolega iz Republike Hrvatske, Crne Gore i Srbije moguće je izvući zaključak da zanemarivanje značaja i uključenosti lokalne samouprave u ove procese može otežati provedbu dogovorenih aktivnosti i dovesti do zastoja provedbe istih. Ovu konstataciju su podržali i predstavnici jedinica lokalne samouprave, učesnici panela, kao i učesnici Konferencije, te naglasili potrebu za uključivanjem jedinica lokalne samouprave u procese pregovora kao i veću podršku i saradnju sa višim nivoima vlasti, a posebno kod pripreme i same provedbe projekata finansiranih od strane EU.

Aktivije učešće u procesima EU integracija jedinica lokalne samouprave u BiH podržava i Ambasador Švedske u BiH, koji je ovim povodom naglasio da: „Pristupanje Evropskoj uniji ima očigledan potencijal za osnaživanje lokalnih samouprava da djeluju u korist građana BiH. U Švedskoj, članstvo u EU je potpuno integrisano u naše društvo i podrška procesa pristupanja EU jeste jedan od glavnih ciljeva angažmana Švedske u BiH,“ istakao je Nj.E. Ambasador Anders Hagelberg.

Šef Delegacije Evropske unije u Bosni i Hercegovini, Nj.E. Lars-Gunnar Wigemark također je istakao da je u razgovorima sa oko pedesetak jedinica lokalne samouprave imao priliku razgovarati sa načelnicima/gradonačelnicima, građanima, predstavnicima poslovne zajednice, nastavnicima, kao i liderima u zajednicama, te kako kaže, u ovom trenutku zna šta funkcioniše, a šta ne funkcioniše u jedinicama lokalne samouprave.

„Iako nam se pristup Evropskoj uniji čini veoma daleko, iskustva drugih zemalja pokazala su da nikada nije prerano za lokalne vlasti da počnu sa pripremama“ poručila je viša savjetnica za socijalnu uključenost i upravu Ambasade Švicarske, Dimka Stantchev Skeie.

Predsjednik Predsjedništva Skupštine Saveza općina i gradova FBiH, Hamdo Ejubović, istakao je da se jedinice lokalne samouprave trebaju pripremiti za jedno novo stanje koje će nastati prilikom našeg ulaska u EU. U tu svrhu, savezi su na osnovu podataka prikupljenih kroz analizu i razgovore sa jedinicama lokalne samouprave pripremili EU mapu puta, u kojoj su identifikovane oblasti i aktivnosti djelovanja kako saveza, tako i tijela saveza u narednom periodu.

Konferencija je organizovana u sklopu Projekta „Jačanje kapaciteta saveza općina/opština i gradova u BiH“, a koji u partnerstvu sprovode Savez općina i gradova Federacije BiH, Savez opština i gradova Republike Srpske, te Savez lokalnih i regionalnih vlasti Švedske, a uz finansijsku podršku vlada Švedske i Švicarske.



KONSULTACIJE PRILIKOM DONOŠENJA ZAKONA O ZAŠTITI OD POŽARA I VATROGASTVU NISU IZVRŠENE U SKLADU SA ZAKONOM

Povodom saopštenja Vlade Federacije BiH sa 173. sjednice održane 27.02.2019. godine da su netačni navodi gradonačelnika Grada Tuzla gospodina Jasmina Imamovića da je Zakon o zaštiti od požara i vatrogastvu („Službene novine FBiH“, br: 65/09) donesen bez saglasnosti lokalne samouprave, te da je u suprotnosti sa Zakonom o principima lokalne samouprave u Federaciji Bosne i Hercegovine, Savez općina i gradova Federacije Bosne i Hercegovine obavještava javnost o sljedećem:

Članom 56. Zakona o principima lokalne samouprave u Federaciji Bosne i Hercegovine („Službene novine FBiH“, br: 49/06, 51/09) propisano je da su federalne odnosno kantonalne vlasti dužne u najvećoj mogućoj mjeri konsultovati jedinice lokalne samouprave u postupku donošenja propisa koji ih se direktno tiču putem Saveza općina i gradova.

U konkretnom slučaju donošenja Zakona o zaštiti od požara i vatrogastvu („Službene novine FBiH“, br: 65/09) konsultovanje nije provedeno po zakonom utvrđenom postupku, te iz svega navedenog proizilazi da su navodi gospodina Jasmina Imamovića tačni.

ODRŽANA TOT RADIONICA O CILJEVIMA ODRŽIVOG RAZVOJA

U sklopu Njemačke organizacije za međunarodnu saradnju - GIZ (Deutsche Gesellschaft für Internationale

Zusammenarbeit) u Skoplju je od 05. do 08. marta/ožujka 2019. godine održana regionalna TOT radionica na temu: „Alati za podizanje svijesti javnosti u kontekstu lokalizacije ciljeva održivog razvoja u općinama“. Na četverodnevnoj radionici prisustvovala je predstavica Saveza općina i gradova Federacije BiH, kao i predstavnici Općine Živinice, zatim učesnici iz Srbije, Albanije i Kosova. Učesnici TOT radionice su se imali priliku upoznati sa ciljevima održivog razvoja i samog podizanja svijesti o ovom veoma bitnom pitanju za lokalnu zajednicu. S obzirom na stečeno znanje i vještine kroz pomenutu radionicu, učesnici su dobili zadatak da svoje znanje prenesu svojim kolegama i koordinatorima općina.

Najuspješnije aktivnosti praćenja u općinama bit će prikazane na Nacionalnoj konferenciji o ciljevima održivog razvoja, koja je planirana u maju 2019. godine.



Učesnici radionice zadovoljni stečenim znanjem





Grb Općine Jablanica

PREDSTAVNICI SAVEZA NA PROSLAVI OBILJEŽAVANJA DANA OPĆINE JABLANICA



Detalji sa proslave Dana Općine Jablanica

U petak, 22. februara/veljače 2019. godine obilježen je Dan Općine Jablanica, gdje su prisustvovali i predstavnici Saveza općina i gradova Federacije Bosne i Hercegovine. Aktivnosti proslave obilježavanja Dana Općine Jablanica započele su polaganjem kamena temeljca na poslovnoj zoni Unis-Gornja kolonija, gdje se okupljenim građanima obratio Salem Dedić, načelnik Općine Jablanica.

Kao i prethodnih godina, zvanice i mnogobrojni sugrađani posjetili su šehitluk na haremu Jasen, a zatim su položili cvijeće na Partizanskom

groblju, ispred Spomenika civilnih žrtava rata "1992-95", na Centralnom spomen obilježju šehidima, poginulim i nestalim borcima ARBiH "1992-95" i pred Spomenikom jablaničkim prvoborcima na gradskom parku.

Nakon toga zvanice su se uputile prema konferencijskoj sali Hotela "Jablanica", gdje je održana Svečana sjednica Općinskog vijeća Jablanica, uz prisustvo velikog broja zvanica i sugrađana ovog područja.

NAJAVA SASTANKA MREŽE PRAKTIČARA/KOORDINATORA IZ JEDINICA LOKALNE SAMOUPRAVE ZA RAD SA MJESNIM ZAJEDNICAMA

21.03.2019. godine u Bijeljini će se održati zajednički sastanak Mreža praktičara/koordinatora zaposlenih u jedinicama lokalne samouprave koji se bave poslovima mjesnih zajednica, u organizaciji Saveza općina i gradova Federacije Bosne i Hercegovine i Saveza opština i gradova Republike Srpske, a uz podršku Projekta „Jačanje uloge mjesnih zajednica u Bosni i Hercegovini“, koji finansiraju Vlade Švicarske i Švedske, a provodi Razvojni program ujedinjenih nacija - UNDP. Na ovom sastanku, na koji su pozvane sve jedinice lokalne samouprave iz Bosne i Hercegovine, će biti predstavljena Metodologija rada mjesnih zajednica - set dokumenata koji su razvijeni kroz projekat „Jačanje uloge mjesnih zajednica u Bosni i Hercegovini“ tako da će se sve jedinice lokalne samouprave imati priliku da se upoznaju sa ovim dokumentima i da po mogućnosti primjene iste u svojim lokalnim zajednicama. Panel diskusija sastanka će se fokusirati na pitanja finansiranja potreba mjesnih zajednica u Bosni i Hercegovini uključujući izazove i probleme u procesu planiranja i trošenja sredstava namijenjenih za finansiranje poslova mjesnih zajednica.

POZIV ZA PRISUSTVOVANJE SAJMU „MACFRUT 2019“

Vodeći italijanski sajam proizvodnje, logistike i distribucije voća i povrća „Macfrut 2019“ čiji je partner Agencijom za unapređenje stranih investicija u BiH (FIPA) održat će se od 8. do 10. maja 2019. godine u Riminiju (Italija).

Na prošlogodišnjem sajmu „Macfrut 2018“ prisustvovali su izlagači 40 zemalja svijeta, koji su imali priliku predstaviti svoje proizvode velikom broju posjetilaca (ukupno 43.000). Tokom sajma predstavnici FIPA-e i bh. kompanija ostvarili su uspješne kontakte sa izlagačima na sajmu iz Italije, Kine, Španije, Francuske, Egipta, Kolumbije i drugih zemalja. Tom prilikom su predstavljene prilike BiH u poljoprivrednom sektoru sa naglaskom na proizvodnju voća i povrća, te je uspostavljena poslovna saradnja bh. kompanija sa izlagačima kako bi se pronašla nova tržišta za plasman njihovih proizvoda.

Više informacija o samom sajmu mogu se pronaći na <https://www.macfrut.com/en/>. Svi zainteresovani se mogu prijaviti do 20. marta/ožujka 2019. godine na sljedeći e-mail gordana.radovic@fipa.gov.ba.





Musala 5/1

71000 Sarajevo

Telefon: ++387 33 216 502, 209 024, 209 120

Fax: ++387 33 552 810, 216 502

E-mail: press@sogfbih.ba

Pratite nas na:

Gledajte Savez općina i gradova
Federacije Bosne i Hercegovine na

YouTube

Pratite Savez općina
i gradova FBiH na

g+

facebook
Savez općina i gradova Federacije
Bosne i Hercegovine

Poštovani čitaoci,

putem ovog biltena pružamo Vam mogućnost da se informišete o aktivnostima Saveza, o bitnim dešavanjima u općinama i gradovima, aktivnostima naših partnera, institucija vlasti, kao i o razmjeni najboljih iskustava i praksi.

Na ovaj način Vam, također pružamo informacije o održanim konferencijama, seminarima, radionicama, okruglim stolovima, javnim raspravama, o održanim sjednicama organa i tijela Saveza.

Ukoliko želite da se prijavite za primanje ovog biltena možete to učiniti tako što ćete poslati e-mail na: press@sogfbih.ba

Molimo vas da informacije o našem biltenu prosljedite svim u vašoj i susjednim općinama i drugim zainteresiranim.

Ukoliko želite da objavite neke od vaših novosti, iskoristite bilten Saveza, koji je brz i efikasan način komuniciranja.

Sa zadovoljstvom očekujemo vaše komentare, sugestije i primjedbe.

NAJAVA OBILJEŽAVANJA DANA OPĆINA I GRADOVA ZA MJESEC MART/ OŽUJAK

- **15. mart/ožujak - Dan Općine Dobretići.** Naime, na taj datum Parlament Federacije BiH formirao je Općinu Dobretići.
- **17. mart/ožujak - Dan Općine Trnovo.** Na ovaj dan izvršena je reintegracija područja općine Trnovo 1996. godine.
- **18. mart/ožujak - Dan Općine Fojnica.** Ovaj datum je uzet za obilježavanje Dana općine jer se u dokumentima dubrovačkih trgovaca na taj dan 1365. godine prvi put spominje grad Fojnica.
- **18. mart/ožujak - Dan Općine Sapna.** Ovaj dan je uzet za obilježavanje Dana Općine zato što je tog dana 1998. godine održana prva sjednica Općinskog vijeća novoformirane Općine Sapna.
- **19. mart/ožujak - Dan Općine Foča-Ustikolina.** Na ovaj dan izvršena je reintegracija područja općine 1996. godine.
- **20. mart/ožujak - Dan Grada Zenica.** Na taj dan 1436. godine Zenica je prvi put spomenuta u dokumentu kojim se dubrovačkim trgovcima omogućava slobodno kretanje i poslovanje na području Bosne.
- **21. mart/ožujak - Dan Općine Dobojug.** Dan Općine Dobojug je 21. mart, kada je 1998. godine održana prva Konstituirajuća sjednica Općinskog vijeća nakon proglašenja-uspostavljanja novih općina. Također, tada je Armija RBiH 21. marta 1993. godine zaustavila veliku neprijateljsku ofanzivu u Bici na Karušama, tzv. tenkowska bitka u kojoj su jedinice 293. Slavne motorizovane brigade ARBiH "Doboj-Bosna" uništili osam tenkova i tri transportera bivše JNA, odnosno vojske tzv. RS-a.
- **21. mart/ožujak - Dan Općine Travnik.**

